

Kāhore he tamaiti, he kaiako rānei e kore e pārekareka i te whiwhi pukapuka hōu. Ko te tūmanako ia ka pārekareka mai anō koutou i tēnei kōrero paki ā-tihi o *Oti te Nanekoti*.

Oti te Nanekoti

Hei āwhina i te hunga tamariki ki te ako mō te hua o te aroha

Kia ora. Anei te hura i te kōrero paki ā-tihi o *Oti te Nanekoti* i runga i te manahau i tēnei te wiki hei whakapāhunu i te mahi whakaweti!

Ko *Oti te Nanekoti* he pakiwaituhi ā-tihi hei āwhina i te hunga tamariki ki te ako i te hua o te aroha, arā te ngākau māhaki. Ehara i te mea me tiki rawa te kupu 'whakaweti' hei mea ako i te tamaiti ki ngā pūkenga whakawhanaunga tangata hei kaupare i aua momo whanonga. Ko te aronga ia ko te ako i te tamaiti kia noho ngātahi i roto i te ngākau māhaki.

Ko tā *Oti te Nanekoti* whāinga he āwhina i te pakeke ki te kōrero ki te tamaiti mō ngā ara ka taea te whai inā tūpono whakawetingia ai te tangata – arā te kata, te aro-kore atu, te tauawhi rānei i te mea whakaweti.

Ko te aroha ko te tino toa, ā, kōia tonu ko te kura e huraina nei e Oti.

He mea waihanga te kōrero paki nei mā ngā tamariki o waenga i te whā me te whitu tau te pakeke, heoi ka taea tonutia e ngā reanga katoa.

Tēnā kia ruku atu tātou!



Te wheakoranga ā-akomanga:

1: Pānuitia te kōrero paki o Oti te Nanekoti

Kei te ipurangi te kōrero o Oti te Nanekoti e iri ana. Tikina atu he pouaka whakaata nui tonu kia pai ai te mātakitaki a te tini tamariki i te ataata.

Ki te kore he tukuata, whakawehea ngā tamariki kia noho ā-rōpū iti noa, kātahi ka whakanohonoho ki mua rorohiko pānoro kia pai ai tā rātou wheako i te kōrero paki.

Mēnā he pūrere hiko iti tā ngā ākonga, tohutohua pea rātou kia pānui i te kōrero i waenganui i a rātou anō.

Kua tuhia tēnei kōrero paki ki te reo Māori, ki te reo Pākehā anō hoki. Ka mutu, e toru ngā wheakoranga hei kōwhiriwhiri māu – te pānui, te mātakitaki, te mātakitaki me te pānui rānei.

Hei tūtohu, tohua ko te ara 'mātakitaki' hei wheakoranga tuatahi māu e rongorongo ai koe ki te reo pānui o Piripi Taylor (Māori), o David Fane (Pākehā) rānei, kātahi ka toro haere ki ngā tini kōwhiringa kē atu o tēnei paetukutuku.

Mei kore ake ko ngā puoro me te ataata inati i ngangahau ai tēnei kōrero paki ā-tihi, ā, nō mātou te māringanui i te tūnga mai o Te Tira Puoro o Aotearoa ki te hāpai i ngā oro, hei kīnaki anō hoki i ngā taonga puoro Māori ka rāngona.

Tēnā kōwhiria te reo hei wheakoranga māu, kātahi ka ruku i te kōrero.

www.oatthegoat.co.nz

www.otitenanekoti.co.nz

2: Tēnā, kia kōrero tātou

He mea nui kia mātua mārama ai ngā tamariki ki ngā kōnekeneke o te kōrero paki me ngā kupu hōu i mua i te whakawhitiwhiti kōrero mō ngā huatau o raro nei. Hei āwhina pea ko ēnei ui whāngai hei whakaaroaro mā ngā tamariki.

Whakakotahingia rātou, whakarōpūngia rānei – kei a koe te tikanga, kātahi māu pea rātou e arataki kia whakaaroaro ki ngā pātai.

1. Ko hea ngā wāhanga o te kōrero kōore i mārama?
2. Kua kite rānei koe i tētahi tangata e whakawetitia ana, pēnei i tā Oti te Nanekoti e kite ai i te kōrero paki? I pēhea ki a koe? Tēnā kia kōrero tātou mō taua āhuatanga...
3. He aha hoki te ara tika i kōwhiria e Oti i te wā i tūpono atu ia ki te hunga e whakawetitia ana?
4. Ki ōu whakaaro, he aha te mahi tika māu ki te tūpono atu koe ki tētahi āhuatanga whakawetiti?

Hei whakaaroaro whai muri i te pānui:

5. Māu pea te wheakoranga o āu ākonga e whakaniko. Ko koe tonu e mōhio ana ki ngā āhuatanga ako e pai ana ki a rātou.
6. Whakahautia ngā tamariki kia kōrero tahi mō ō rātou whakaaro, mō ngā mahi a ētahi atu, ō rātou whakaaro anō hoki?
7. Whakahaua te katoa kia tuku, whakahoahoa kōrero anō hoki kia whanake ai ngā whanonga tika ki roto i a rātou.

3: Tukuna te kōrero kia rere

Kei roto i tēnei kete rauemi ētahi pānui whakaahua, ētahi whakaahua hāpiapia anō hoki mā ia tamaiti.

Tēnā koa, whakairia ngā pānui whakaahua ki ngā wāhi e mārama kitea ai e ngā tamariki me ō rātou whānau. Ākina rātou kia whakamau ai ngā whakaahua hāpiapia i te kāinga kia rata mai ai ō rātou mātua, whanaunga anō hoki kia pānui anō ai i tēnei kōrero paki i te kāinga.

Māu pea tētahi mahi whakaharaha e whakarite mā rātou, ā, ko te whakaahua hāpiapia pea hei taonga i te otinga. Ko te noho ngākau māhaki tonu hei kaupapa mō te mahi – pēnei i a Oti me ōna hoa!

Tēnā koa, tuaringia te hononga o tēnei kōrero paki ki ngā tini puna ako, kōhanga reo anō hoki, kei roto i tōu hapori.

Pōhīngia anō pea ki te pae tukutuku o te kura, ki ngā pae pāpori hoki pēnei i Pukamata kia horapa whānui ai ki te motu.

Ki te hiahia whakapā mai koe, tēnā tuhi īmera mai ki:
oat.thegoat@education.govt.nz

He mahi tākaro anō kei:
<https://www.bullyingfree.nz/parents-and-whanau/oat-the-goat>

www.oatthegoat.co.nz
www.otitenanekoti.co.nz

